

« 21 » ապրիլ 2025թ. No 2383 - Լ

**ՄԱՆԿԱԲԱՐՁԱԳԻՆԵԿՈԼՈԳԻԱԿԱՆ ԲԺՇԿԱԿԱՆ ՕԳՆՈՒԹՅՈՒՆ և
ՍՊԱՍԱՐԿՈՒՄ ԻՐԱԿԱՆԱՑՆՈՂ ԲԺՇԿԱԿԱՆ
ԿԱԶՄԱԿԵՐՊՈՒԹՅՈՒՆՆԵՐՈՒՄ, ԻՆՉՊԵՍ ՆԱԵՎ ՆՈՐԱԾՆԱՅԻՆ ԵՎ
ՆՈՐԱԾՆԱՅԻՆ ԻՆՏԵՆՍԻՎ ԹԵՐԱՊԻԱՅԻ ԲԱԺԱՆՄՈՒՆՔՆԵՐՈՒՄ ԿՐԾՔՈՎ
ԿԵՐԱԿՐՄԱՆ ԽՈՐՀՐԴԱՏՈՒԻ ԱՇԽԱՏԱՆՔԻ ԸՆԴՀԱՆՈՒՐ ՆԿԱՐԱԳԻՐԸ
ՀԱՍՏԱՏԵԼՈՒ ՄԱՍԻՆ**

Հիմք ընդունելով ՀՀ վարչապետի 2018 թվականի հունիսի 11-ի թիվ 728-Լ որոշման 18-րդ կետի 20-րդ ենթակետը, և 04.12.23 թվականի ՀՀ առողջապահության նախարարի «Հիվանդանոցային պայմաններում մանկաբարձագինեկոլոգիական տեսակի բժշկական օգնության և սպասարկման իրականացմանը ներկայացվող պահանջները՝ ըստ մակարդակների հաստատելու մասին» N 5798-Լ հրամանով սահմանված պահանջները՝

ՀՐԱՄԱՅՈՒՄ ԵՄ

Հաստատել՝

- 1) մանկաբարձագինեկոլոգիական բժշկական օգնություն և սպասարկում իրականացնող բժշկական կազմակերպություններում, ինչպես նաև նորածնային և նորածնային ինտենսիվ թերապիայի բաժանմունքներում կրճքով կերակրման խորհրդատուի աշխատանքի ընդհանուր նկարագիրը՝ համաձայն հավելվածի:
- 2) Առողջապահության նախարարության հասարակայնության հետ կապերի բաժնի պետ Լիլիթ Բաբախանյանին՝ ապահովել սույն հրամանի տեղադրումն առողջապահության նախարարության պաշտոնական կայքում:
- 3) Սույն հրամանի կատարման հսկողությունը հանձնարարել առողջապահության նախարարի տեղակալ Արմեն Գասպարյանին:
- 4) Սույն հրամանը ուժի մեջ է մտնում 2025 թվականի մայիսի 1-ից:

Ա. ԱՎԱՆԵՍՅԱՆ

ՆԿԱՐԱԳԻՐ

ՄԱՆԿԱԲԱՐՁԱԳԻՆԵԿՈԼՈԳԻԱԿԱՆ ԲԺՇԿԱԿԱՆ ՕԳՆՈՒԹՅՈՒՆ ԵՎ
ՍՊԱՍԱՐԿՈՒՄ ԻՐԱԿԱՆԱՑՆՈՂ ԲԺՇԿԱԿԱՆ ԿԱԶՄԱԿԵՐՊՈՒԹՅՈՒՆՆԵՐՈՒՄ,
ՆՈՐԱԾՆԱՅԻՆ ԵՎ ՆՈՐԱԾՆԱՅԻՆ ԻՆՏԵՆՍԻՎ ԹԵՐԱՊԻԱՅԻ
ԲԱԺԱՆՄՈՒՆՔՆԵՐՈՒՄ ԿՐԾՔՈՎ ԿԵՐԱԿՐՄԱՆ ԽՈՐՀՐԴԱՏՈՒԻ ԱՇԽԱՏԱՆՔԻ
ԸՆԴՀԱՆՈՒՐ

1. Կրճքով կերակրման խորհրդատու՝ ավագ բուժաշխատողը ունի համապատասխան բարձրագույն կրթություն ու բժշկի որակավորում, մասնագիտացում (մանկաբուժություն, նեոնատոլոգիա, մանկաբարձություն և գինեկոլոգիա), օրենսդրությամբ սահմանված կարգով ստացել է մասնագիտական գործունեության և ՇՄՁ հավաստագրեր:

2. Կրճքով կերակրման խորհրդատու՝ միջին բուժաշխատողը ունի առնվազն միջին մասնագիտական որակավորում, առնվազն 1 տարվա աշխատանքային փորձ մանկաբուժության, նեոնատոլոգիայի կամ մանկաբարձ-գինեկոլոգիայի ոլորտում և օրենսդրությամբ սահմանված կարգով ստացել է առաջին անգամ մասնագիտական գործունեության կամ ՇՄՁ հավաստագիր:

3. Կրճքով կերակրման խորհրդատուների (ավագ և միջին բուժաշխատողներ) համար պարտադիր է համարվում վերապատրաստումները՝ առնվազն «Կրճքով սնուցման խորհրդատվության» 40-ժամյա դասընթաց (ՇՄՁ կրեդիտավորված):

4. Կրճքով կերակրման խորհրդատուների կողմից տրամադրվում է խորհրդատվություն՝ հղիներին, ծննդկաններին, կերակրող մայրերին կամ երեխային խնամող անձանց, բուժանձնակազմին:

5. Կրճքով կերակրման խորհրդատուի հիմնական գործառույթներն են.

1) Աջակցել ծնողներին և նորածիններին հաղթահարել կրճքով սնուցման ընթացքում առաջացած խնդիրները, առավելագույնս աջակցել կրճքով կերակրման գործընթացին:

- 2) Պարբերաբար կազմակերպել մայրերի և երեխաների խնամքով զբաղվող բուժանձնակազմի համար կրծքով սնուցման խորհրդատվության թեմայով վերապատրաստման դասընթացներ (առնվազն 2 տարին մեկ), հանդիպումներ, թեմատիկ զրույցներ:
- 3) Կազմակերպել հղիների նախածննդյան հսկողություն իրականացնող բժշկական կազմակերպություններում հղիների համար կրծքով սնուցման թեմայով նախածննդյան ուսուցման դասընթացներ՝ ՀՀ ԱՆ չափորոշիչներում ներառված ծավալով:
- 4) Իրականացնել դեղերի և կրծքով կերակրման համատեղելիության վերաբերյալ խորհրդատվություն:
- 5) Մայրերի հետ յուրաքանչյուր զրույցի ընթացքում կիրառել «լսելու և իմանալու», «վստահություն ձևավորման և աջակցության» հմտություններ:
- 6) Նպաստել հնարավորինս շուտ և շարունակական «մաշկ-մաշկին» շփման գործընթացի կազմակերպմանը:
- 7) Աջակցել կյանքի առաջին ժամվա ընթացքում կրծքով կերակրման գործընթացին:
- 8) Աջակցել մայրերին հասկանալ երեխայի կերակրմանը պատրաստ լինելու նշանները:
- 9) Մայրերի հետ քննարկել կրծքով կերակրման մեխանիզմները, դիրքերը:
- 10) Աջակցել մայրերին նորածին կրծքին ճիշտ ամրակցման հարցում:
- 11) Բացատրել մայրերին կաթնարտադրության մեխանիզմը, կրծքագեղձի անատոմիան:
- 12) Ըստ անհրաժեշտության աջակցել մայրերին կուրծքը կթելու հմտություններ ձեռք բերելու հարցում և տրամադրել խորհրդատվություն կրծքի կաթը կթելու (ձեռքով, կթիչ) և կթած կաթի պահպանելու գործընթացի կազմակերպման հարցում:
- 13) Աջակցել մայրերին, որոնք չեն կերակրել նորածիններին հետծննդյան վաղ շրջանում՝ հետագայում կրծքով կերակրումը բարեհաջող կազմակերպելու նպատակով (օրինակ՝ նորածինը գտնվում է ինտենսիվ թերապիայի բաժանմունքում):
- 14) Վերահսկել բժշկական կազմակերպությունում մանկանը բարեկամ 10 քայլերի պատշաճ իրականացմանը:

- 15) Հետևել «Երեխաներին կրծքով կերակրման խրախուսման և մանկական սննդի շրջանառության մասին» ՀՀ օրենքի և «Կրծքի կաթի փոխարինիչների վաճառահանման միջազգային օրենսգրքի» դրույթների պահպանմանը:
- 16) Հակազդել կրծքի կաթի փոխարինիչների ցանկացած տեսակի գովազդին՝ բուժաշխատողներին քողարկված գովազդի բացահայտման և կանխարգելման նպատակով:
- 17) Լրացնել կրծքով կերակրման դիտարկման թերթիկը, համաձայն 01.03.2021 թ. ՀՀ առողջապահության նախարարի N 11-Ն հրամանով հաստատված հավելված 3-ի:
- 18) Բուժանձնակազմի համար պարբերաբար իրականացված և նախատեսվող վերապատրաստումների վերաբերյալ տեղեկատվությունը տեղադրել բժշակական կազմակերպության պաշտոնական կայքում:
- 19) Հավաքագրել բացառապես կրծքով կերակրման ցուցանիշների վերաբերյալ տվյալները և ամփոփված տեղեկատվություն տեղադրել բժշակական կազմակերպության պաշտոնական կայքում:
- 20) Ծննդատնից դուրս գրվող մայրերին գրավոր տեղեկատվություն տրամադրել հետագա բարեհաջող կրծքով կերակրման և բավարար կաթնարտադրության ապահովման վերաբերյալ:
- 21) Արհեստական կաթնախառնուրդի նշանակման յուրաքանչյուր դեպքում հարցը քննարկել նեոնատոլոգի հետ՝ մոր (անհնարինության դեպքում՝ խնամողի) մասնակցությամբ:

6. ԿՍԽ ավագ բուժաշխատողի լրացուցիչ գործառույթներն են.

- 1) Աջակցել հիվանդ նորածնի կրծքի կաթով սնուցման գործընթացին:
- 2) Աջակցել մայրերին ցածր քաշով կամ հիվանդ նորածինների կերակրման գործընթացին:
- 3) Աջակցել բնածին արատներով երեխաների սնուցման կազմակերպման գործընթացին: